

EHUMITHOKOMEHO NEGAMENO LYOOSIKOLA OKUPITILA PAMIKALO DHEKWATATHANO POSIKOLA



JESSICA NAMARY TAYA POPI

Mary, Gabes oha kala ta piyaganeke ndje, kandi shi wo kutya nandi ninge ngiini opo kaa piyaganeke ndje we.

Oha ningi shike?



Okwa hala anuwa ndi ninge po gwe, ashike onda ti inandi hala. Ngashinge yi kehe ethimbo tandi tsakanene naye oha kala ashike ta popi iinima iiwinayi yi na sha nomilalo nonkene handi monika. Nena okwa ti anuwa ita hulitha po okuya a hale ndje sigo anuwa nde mu itaale a ninge po gwandje. Oshili osha ninga ndje ndi kale inaandi manguluka. Nandi ninge ngiini? Oshili kwathela ndje!

Shoka otashi monika ko nee sha fa ethiminiko lyopamilalo. Ina pitikwa e ku ule ngaaka kosikola. Otashi ka nayipala ngele ito ningi po sha. Oto dhimbulukwa okamati heya ka nukilile Monica momuhandjo omvula ya zi ko konima sho ka kala noku mu thiminikila ya ye momilalo uule woomwedhi? Otu na okukala twa ninga po sha opo oshinima shoka kuu shi ningilwe. Otu na okupopya nomulungi kombinga yoshinima shika!

JANE OMUMWAYINAKADHONA GWAJESSICA TE YA MONDUNDA

Mary, omukadhona ngono omunene oha kala nokunyolela ndje omatumwalaka guulayi uule wiwiike, ndele nena ta yaka po iimaliwa yandje yoku ka landa omwiha!

Itaya vulu okuninga ngawo, Jane! Osho okuningilila mo ashike. Omukalo gwomaihumbato gaakadhona mbono niinima mbi haya ningi oyi li ompinge noveta yekwatathano lyaalongwa. Omukalo ngu Gabes he ku ihumbaatele Jessica, nago ogu li ompinge noveta. Natu lombwele Tate Smit.




Tate Smit, aakadhona mbono aanene oya yaka iimaliwa yandje komumwamemekadhona Jane, nohaya kala taye mu ningi nayi.

Eeno, Gabes oha kala a landula Jessica, noha kala te mu thiminikile momilalo.

Jessica, otwa li twa puka. Aalongi kaye na ko nasha. Otu na ashike oku shi longa mo tse yene.

Ondi shi shi kutya Tate Smit ke li mondjila. Omukuluntusikola Meme Afrikaner, okwe tu lombwele kutya opu na oveta ndjoka hayi longithwa mekwatathano lyaalongwa naalongi ayehe posikola. Otatu popi naye kombinga yoshinima shika.



Aalongwa mboka ya monika ondjo momakwatathano otaya ka pulwapulwa kosikola konima yomapulakenenoguno giihokolola. Egeelo tali vulika lya kwatela mo:

- epukululo
- iilonga ya gwedhwa po yi na ekwatathano nepogolo
- Ekundathano naavali yomulongwa
- elondodho pamushangwa

Onda pandula sho wa li we ya wu tseyithile ndje oshinima shika, Mary. Owa ninga nawa. Ooveta dhomakwatathano gaalongwa otashi ti kutya aalongwa ayehe oye na oku simaneka ongushu, omuntu nomaliko gaalongi naalongwa, naalongwa inaa ehameka aalongwa ooyakwawo nenge yi ihumbate nayi, pamikalo inaadhi taambwa ko kaalongwa ooyakwawo.

Omulandu gu na ongushu nekwatathano pamulandu gwelongo
ogu na ooveta odhindji kombinga yankee aalongi ye na okwiihumbata.
Aalongwa ayehe oye na oshinakugwanithwa shokugandja esimaneko kaalangi yawo, nonande ya kale kaayu uvitathane moshinima shontumba, ashike naalangi oye na wo oshinakugwanithwa shokugandja esimaneko kaalongwa. Tate Smit ke na okuyamukula Jane nenge Jessica pamukalo ngu gwa hokololwa.



Aalongwa mboka ya monika ondjo momakwatathano otaya ka pulwapulwa kosikola konima yomapulakenenoguno giihokolola. Egeelo tali vulika lya kwatela mo:

- epukululo
- iilonga ya gwedhwa po yi na ekwatathano nepogolo
- Ekundathano naavali yomulongwa
- elondodho pamushangwa
- ekuthwo mosikola pakathimbo
- etidho

Tangi Meme Afrikaner.
Oshike tashi ningwa po ngashingezi?





Otandi ka popya najane najessica nokukonakona omaihumbato gaGabes nogaakadhona aanene. Ondi na wo oku ka popya na Tate Smit. Osha simana aalongi ayehe naalongwa opo ya kale ye shi okukwatela po ooveta nomisindalandu nokwiyyutha kudho. Omulongwa kehe oku na uuthemba wokukala u uvite e li megameno nokwa simanekwa posikola.



AYEHE MBOKA HAYA HINDI NOKUNINGILILA
MO YAKWAWO OYI ITHANWA KOMBELEWA
YOMUKULUNTUSIKOLA

OMBELEWA
YOMUKULUNTUSIKOLA



Oveta nElandulathano yi na sha nOmusindalandu gwElongo

Omulungi, mekwatathano naalongwa -

- oku na okupingena po oshinakugwanithwa shaavali uuna omulongwa e li mosikola nuunta kutha ombinga mooprograma dhiinyangadhalwa yosikola meni nopondje yosikola
- Oku na okugwanitha po ii longa yuulongi nokukwathela aalongwa niilonga yuungundu yomulandu glluministili ngoka gu uthwa kOmusindalandu gwElongo
- Oku na okukala a kwashilipalelwa kutya omupondo gwelongo neilongo otagu humu komeho nogwa adha tuu omuthika gwopombanda posikola
- Oku na okusimaneka uuthemba wekotampango nesimano lyomulongwa kehe nopwaa na omafekelo, mwa kwatelwa uuthemba welongo, ethikopamwe lyomuthigululwakalo, nuuthemba wopaumwene
- Oku na okuyambidhidha ethikopamwe lyuukashikekookantu nokwikeya komikalo kehe dhokayoya mwa kwatelwa omatompelo ge na sha nombuto yo-HIV/AIDS nenge nuundjolowe.
- Oku na okuyambidhidha okwaataamba ko omithika dhomaihumbato nehumokomeho mokati kaalongwa
- Oku na okuyambidhidha omaiyuvo goshinakuwanithwa mokati kaalongwa taga zi maalongwa yo yene, mosikola yawo, momakula nomomidhingoloko dhawo.
- Ina pitikwa, pamutungilo kehe, a piyaganeke nenge a hepeke omulongwa (oshiholelwa, palutu, pamaiyuvo nenge pantseyomwenyo)
- Ina pitikwa a gandje egeeloputudho nenge omukalo kehe gu na sha negeelo lyokweehameka omulongwa
- Ina pitikwa a yane uuyeletele wu na sha nomulongwa mboka a pewa meholamo nenge momulandu gwoonkatu dhiilonga
- Ina pitikwa a taambe ombumbo kehe mokupukulula omulongwa moshilongwa kehe shosikola nopwaa na epitikilo lya sheywa
- Ina pitikwa a tindile onzapo yehumokomeho lyiilonga yomulongwa onga omukaloyeleko gwegeeloputudho nenge inaa futa ofuto yosikola
- Ina pitikwa a longithe nayi eithano lye molwiimaliwa, papolitika nenge pakulikola paumwene
- Ina pitikwa a longithe elaka nenge omukalo ngoka tagu nkundipaleke einekelo nesimaneko lyomulongwa kehe
- Ina pitikwa i idhope monkalo kehe ya nika omakwatathano gopahole nenge gopaihulo nomulongwa nenge omahindo gopaihulo nenge ehepeko lyomulongwa
- Ina pitikwa a tongole nando omulongwa kehe omolwonkalo ye yopalutu nenge ekoko lye molwuulema nenge ihaa vulu okwiikwatha mwene (ha yambidhidhw), ihe a kwathe omulongwa kehe opo a adhe elalakano lye meudhililo.

Aalongi otaya tegelelwa ya:

- Dhike ehala lyiilakanenwa yomudhingoloko gwosikola gweputudho gwa gamenwa, opo ehumokomeho nomakwatho gongushu yeilongo nomilandu dhelongo ga kale ge li megameno
- Eete po omudhingoloko gwokusila oshimpwiyu nokuputudha aalongwa opo ya vule yo yene okuhumitha esiloshimpwiyu, uushili niinakugwanithwa yaakuluntu
- O ogame/a yande okwiikeelala kelongitho lyoonkondo onga ogwo omukalo gwelongo neputudho poshitaafula.



Meme Afrikaner okwa popi natse mombelewa ye ongula yonena. Okwe tu lombwele kutya okwa popya naakadhona naTate Smit. Okwe tu pa wo okopi yOmilandu dhakwalukehe dhOveta nElandulathano lyAalongwa. Tangi Mary. Ngashingezi tse najane otu uvite twa gamenwa posikola.

Owa taambiwa ko. Meme A okwa lombwele ndje kutya osha simana noonkondo opo aalongwa ya kale ye shi uuthemba wawo wOmilandu dhElandulathano, nOmushangwahokololo gwEihumbatonayi. Uuna omulongwa inaa lopota eihumbatonayi nenge omahindo gopaihulo gomulongwa omukwawo nenge ngaa gaalongi, otashi vulu okufala momahepeko gopalutu nenge gopaihulo ganakupwe. Onda nyanyukwa molwashoka ngashingezi owu uvite wu li megameno.



Omilandu dhakwalukehe dhOveta nElandulathano lyAalongwa

Omulongwa mosikola yepangelo –

- oku na lelalela okukala tayi aluhe kosikola, okukala momitumba dhosikola palandulathano lyethimbosikola, okwiilonga omitumba nokuninga iilongadhalwa yilwe yosikola mbyoka yi na okukala ya ningwa
- oku na okwiihumbata nokusimaneka oompango nomalandulathano gomukuluntusikola, aalongi, aanambelewa naalongwa yoposikola mpoka nenge momuhandjo
- oku na okwiisimaneka ye mwene nenge eilongo lye nokukala a manitha iinakugwanithwa yomusindalandu niithigilwalonga
- oku na okusimaneka ondhilo, omuntu niinima yaalongi, aalongwa naanamukunda
- oku na okutaamba ko nokusimaneka omithigululwakalo dhaalongwa naalongi yoposikola
- oku na okukala nokutula melandulathano oompango dhosikola nenge dhomuhandjo ngaashi dha tulwa po kewliko lyosikola
- oku na okugandja eyakulo lyopombanda lyuundjolowele nuuyogoki, eitulomo neholokopo ewanawa
- ita vulu okwiihumbata ye mwene pasithahoni, pamukalo gwaa li nawa nenge eholokopo ewinayi
- ita vulu okweeta mehala lyosikola nenge momuhandjo, iikondjitho kehe yoondjembo, oshikuti, uutati, ekatana, ombele nenge kehe tuu iilwitho ya nika oshiponga
- ita vulu a longithe meni lyosikola nenge momuhandjo, a longithe iingangamithi nenge iigwanga nopwaa na ombapila ya za komundohotola gopaunamiti
- ita vulu okukala ta landitha nenge te eta mosikola nenge momuhandjo, nenge ta topola kaalongwa ooyakwawo mosikola nenge momuhandjo, iingangamithi nenge iigwanga nopwaa na omushangwahokololo gwa za komukonakoni gopaunamiti
- ita vulu okulala naalongwa ooyakwawo mboka yaa shi yoludhi lumwe nopwaa na epitikilo lyomukuluntu gwomuhandjo
- ita vulu okuyonagula, okuteyagula nenge okuhalakanitha eliko lyepangelo, lyosikola nenge lyomuntu gulwe
- ita vulu okuninga omikalo dha tya ngaaka ndhoka tadhi yonagula elandulathano lyosikola nenge tadhi piyaganeke egeeloputudho ewanawa nehumokomeho lyeilonga lyalangwa yalwe
- ita vulu okwiidheula nenge okukutha ombinga miituthi kehe yaalongwa aape shoka tashi etitha eehameko lyopalutu nenge lyopamaiyuvo kaalangwa aape
- ita vulu, nomainyengo nenge nomaihumbato ge omawinayi nenge a nwethe mo aalongwa yalwe yaa simaneke ooveta dhosikola

Aanamibia
ayehe oye na
uuthemba
wokulongwa.

Oveta yOmusindalandu otayi gandja
uuthemba kaalongwa nokaalongi ayehe
posikola. Tseyal uuthemba woye e to
kala wi ikolelela kuwo posikola. Opo ihe
aalongwa ayehe taya vulu okutiyapula
egameno poosikola, noya manguluka
keningonayi nelongithonkondo.

Dhimbulukwa,
haalongi ayeke ye na
oshinakugwanithwa
shokwiühumbatela nawia
aalongwa. Aalongwa nayo
wo oye na okusimaneka
ondhilo, uuntu nomaliko
gawo yene nogaaalongi.




OWU NA ... EPULO? ... EGWEDHELOPO? KWATATHANA NATSE!

Email: comic@lac.org.na

Fax: 088-613693

Post: P.O. Box 604 Windhoek

**Otwa hala okuuva
eyamukulo lyoye kombinga
yoshinyolwa shika.**



Ehokololo:
CHRISTINA BENINGER

Omundongeki:
NDALIPO MUPUPA

Omafano, omutholomo nEtulomelandulathano:
DUDLEY VIALL naPERRI CAPLAN

Omuwiliki gwoprograma:
RACHEL COOMER naDIANNE HUBBARD

Omunyanyangidhi:
JOHN MEINERT PRINTING (PTY) LTD

Omukwatheli:
DUTCH MINISTRY OF FOREIGN AFFAIRS,
MDG3 FUND

Omuholokithimbo:
GENDER RESEARCH & ADVOCACY PROJECT,
LEGAL ASSISTANCE CENTRE, 2011

Okafo haka otaka vulu okuningwa ookopi
omolwomalalakano ge na sha nelongo,
shampa ashike onzo ya tseyithilwa.

Ontopolwa yokanyolwa haka yopalusheno
otayi adhika ko-website yo-LAC:
www.lac.org.na